

摘藻堂四庫全書薈要

史部

欽定四庫全書薈要

史部

欽定大清會典卷

二十至
二十三

詳校官編修臣繆晉



欽定四庫全書薈要卷八千二百四十九

史部

欽定大清會典卷二十

禮部



尚書滿漢各一人左右侍郎滿漢各二人掌吉
嘉軍賓客之秩序學校貢舉之法以贊邦禮所

屬有儀制祠祭主客精膳四司

儀制清吏司郎中滿二人漢一人員外郎滿三
人漢一人主事滿漢各一人掌嘉禮軍禮學校

貢舉並隸焉○鑄印局員外郎漢一人筆帖式

署主事滿一人

二年稱職升主事

大使漢一人掌鑄造

寶印

祠祭清吏司郎中滿二人漢一人員外郎滿三

人蒙古漢各一人主事滿漢各一人掌吉禮凶

禮

主客清吏司郎中滿一人蒙古一人漢一人員

外郎滿二人主事滿漢各一人掌賓禮○提督

會同四譯館兼鴻臚寺少卿一人

以本部滿漢郎中奏請

簡攝三

大使漢一人序班漢二人朝鮮通事

年更代

八人掌通外國語言治館舍委積○馬館監督

正一人

以本部司官兼攝

副一人

以理藩院司官兼攝均一年更代

掌

圉人牧芻以待外藩朝覲

精膳清吏司郎中滿漢各一人員外郎滿二人
主事滿一人蒙古一人漢一人掌五禮燕饗食之
儀與其牲牷

堂主事滿三人漢軍一人○司務滿漢各一人
○筆帖式滿三十四人蒙古二人漢軍四人分
隸各司視事之繁簡以為額

樂部典樂

無專員以本部滿尚書暨各部院堂官知樂者兼之

掌五音六

律以合陰陽之聲○和聲署署正滿漢各一人

署丞滿漢各一人

以本部暨內務府司官兼之

供奉供用

無定

員以內務府太常寺鴻臚寺官充攝

分掌協律之事

儀制清吏司

嘉禮

朝會一

凡元日長至次日

萬壽聖節及遇

國家慶典

皇帝御太和殿羣臣上表稱賀則有大朝之儀在外
直省官及四夷屬國豫期表賀至日各率屬望
闕行禮與京朝官同月之每旬五日

皇帝御太和殿受朝則有常朝之儀折本降

旨則有

御門之儀隨時

聽政則

御燕朝召臣工入對日以為常

凡大朝常朝

皇帝禮服羣臣朝服

御門燕朝各從所宜服○元日

萬壽聖節前後三日羣臣入朝咸朝服退朝在公所
采服元宵節前後一日如之常朝日退朝在公
所及月之朔望逢五逢十日咸補服

凡陳設筆硯案在

殿內右楹之南東嚮華蓋在

殿門外正中法駕鹵簿陳東西檐下及丹陛夾兩

階至丹墀以南

詳見鑾儀衛

靜鞭在午階下北嚮仗

馬在左右階下步輦在

太和門外五輅在

午門外馴象在五輅之南朝象在

天安門外皆東西相嚮大朝慶賀設表案於

殿內左楹之南西嚮遇

頒詔設詔案二一於

殿內左楹之北西嚮一於丹陛正中南嚮

凡樂懸中和韶樂在

殿檐東西丹陛大樂在

太和門左右均北嚮鼓吹大部在

午門外東西相嚮中和韶樂

皇帝御座及還宮則奏之樂章

御座元日奏元平長至奏遂平

萬壽聖節奏乾平常朝奏隆平

還宮元日奏和平長至奏允平

萬壽聖節奏太平常朝奏顯平丹陛大樂羣臣行禮
則奏之樂章王公百官奏慶平外國使臣奏治

平大朝常朝同

凡班位親王世子郡王長子貝勒一班貝子八分鎮國公輔國公一班在丹陛之上立位左翼西面右翼東面皆北上拜位親王一班世子郡王一班長子貝勒貝子一班鎮國公輔國公一班左翼西上右翼東上皆北面不入八分公以下文武百官在丹墀之內立位東西各九班班如其品滿官左翼四旗西面右翼四旗東面

皆北上漢官東班吏部戶部禮部宗人府通政
使司翰林院詹事府太常寺光祿寺鴻臚寺國
子監吏科戶科禮科內閣中書欽天監太醫院
在左翼之南西班兵部刑部工部都察院大理
寺鑾儀衛太僕寺中書科兵科刑科工科順天
府京縣五城兵馬司京營將弁在右翼之南拜
位正從各依品級山序立東西各十有八班左
翼西上右翼東上皆北面外國使臣在西班末

立位東面北上拜位北面東上大朝常朝同

凡侍班大學士學士詹事少詹事讀講學士立於

殿東檐第三柱西面左都御史左副都御史立於

西檐第三柱東面皆北上記注官四人立於

殿內西三楹東面前引大臣十人在

寶座前立東西面後扈內大臣二人在

御座旁左右僉立內大臣率豹尾班侍衛左右各十

人在

寶座後兩旁序立大朝常朝同導

駕大朝禮部堂官二人立於丹陛螭頭下常朝鴻臚
卿二人立於丹陛上均東西面北上

凡執事樂部典樂一人立於中和樂懸之次東
面鴻臚寺鳴贊官四人立於東西檐第二柱引
王公鴻臚寺官二人立於丹陛引百官引外國
使臣鴻臚寺官序班各二人立於丹墀皆北上

東西面鑾儀衛傳鳴鞭官六人立於丹陛西階
每階二人皆東面大朝常朝同若大朝慶賀宣
表官一人立於東檐第三柱內閣學士後西面
凡糾儀御史二人立於西檐第三柱東面北上
御史四人禮部司官四人立於丹陛御史八人
立於丹墀班前御史四人禮部司官二人立於
班後皆北上東西面御史四人吏部禮部司官
各二人於班末東西立皆北面大朝常朝同

御門聽政給事中二人御史二人立於西階下東面北上

凡

賜坐王公位

殿內左右楹之後重行北上皆東西面大學士內大臣位王公後不入八分公以下文武百官位原立處大朝常朝同

凡

御門聽政以戶禮兵工四部分日首對三法司直第
三班吏部直第六班若宗人府進章在各部之
先均以滿漢司官各二人陪奏魚貫相次立於
東階下進奏跪

御榻之左尚書左都御史一班侍郎左副都御史大
理卿二班陪奏官三班皆西面北上記注官四
人立於西檐下編修檢討四人立於西階下皆
東面北上各部院豫期具所屬滿漢官各四人

考語移送吏部是日吏部按序列名單隨班引見亦曰侍班

凡燕朝內閣部院每晨入奏事引

見各官遇

皇帝行幸駐蹕則分日奏事以六部都察院內務府鑾儀衛為九班其宗人府理藩院通政使司大理寺詹事府太常太僕光祿寺國子監鴻臚寺欽天監咸分附焉八旗奏事按旗次第輪直以

為常如有事應速奏者不論班次

欽定大清會典卷二十

欽定四庫全書薈要卷八千二百五十

吏部

欽定大清會典卷二十一

禮部

儀制清吏司

朝會二

凡大朝之禮元日長至次日

萬壽聖節皆豫月由部疏請

御殿受賀得

旨先期戒百執事至日五鼓鑾儀使率官校至

太和殿前陳法駕鹵簿樂部率和聲署陳樂懸儀
制司郎中奉在京王公百官賀表入

殿內陳左楹表案內閣中書奉筆硯陳右楹案上
皆退質明王公暨文武一二品官從

皇帝朝於

皇太后宮三品以下官會

午門闕下均行禮畢

儀別具

鴻臚官引王公暨一二

品官入

右翼門引三品以下官入左右掖門東班由

昭德門西班由

貞度門外國使臣從西班咸入就位立禮部堂官

二人詣

乾清門奏請

御殿

午門鳴鐘鼓領侍衛內大臣二人率豹尾班執槍

侍衛十人佩刀侍衛十人立於

乾清門外禮部堂官二人立於

乾清門階下前引大臣十人立於

太和殿後階下祇候導引

皇帝乘輿出

乾清門後扈內大臣二人及

御前

乾清門侍衛從禮部堂官二人恭導由

保和殿

御中和殿座侍班導從官於

殿前行三跪九叩禮不贊禮畢侍班官趨出各就

班位立

駕興禮部堂官二人暨十大臣前導後扈如初中和

韶樂作

皇帝御太和殿陞寶座導從官各就位立樂止鑾儀

衛官進至中階之右三傳鳴鞭階下三鳴鞭退

復位鳴贊官贊排班丹陛大樂作鴻臚官引王
公百官各就拜位班齊贊進衆進贊跪衆跪贊
宣表宣表官入

殿左門詣表案前奉表出大學士二人同至

殿檐下宣表官正中北面跪大學士二人左右跪
展表樂暫止宣表官宣訖奉表還於案復位立
樂作鳴贊官贊叩興王公百官行三跪九叩禮
畢樂止引退復位立次引外國使臣就拜位樂

作贊跪叩興各行三跪九叩禮畢樂止引退復
位立

賜羣臣坐諸王公由

殿左右門入大學士由

殿左門入就位內大臣等各就本立位均跪行一
叩禮坐

賜王公以下文官三品武官二品以上暨外國使臣
茶受茶及坐飲畢皆行一叩禮鑾儀衛官傳鳴

鞭如初衆皆興階下三鳴鞭

駕興中和韶樂作還宮樂止鴻臚官引王公百官各
以次退

凡

內朝之禮元日長至次日

萬壽聖節及恭遇

國家慶典內監設中和韶樂於

乾清宮檐下設丹陛大樂於

乾清門內均左右北嚮

皇帝御太和殿受羣臣朝賀畢乘輿還宮入至

乾清宮檐下降輿中和韶樂作

樂章與外朝同後仿此

皇帝御座樂止內監引

皇后率

貴妃

妃

嬪具禮服詣

乾清宮

皇后就正中拜位立

貴妃

妃

嬪稍後左右立均北面丹陛大樂作奏雖平之章
行六肅三跪三拜禮畢樂止

皇后率

貴妃

妃

嬪各回後宮內監引

皇子由東西階升丹陛就拜位立東班西上西班
東上均北面丹陛大樂作行三跪九叩禮畢樂
止退立兩旁北上東西面立中和韶樂作

皇帝降座樂止

皇子各退○

盛京三大節朝賀之禮是日漏未盡內務府官詣

崇政殿啓扉拂拭

御座禮部官恭設香案於

殿外正中黎明將軍及戶禮兵刑工五部侍郎率
所屬官弁按旗分左右翼於丹墀內列九班班
如其品奉天府尹丞治中通判京縣等官從右
翼協領叅領視府尹暨丞降一等東班西上西
班東上朝服行禮與

京師同○直省三大節朝賀之禮於行禮公所恭

設

萬壽龍亭於正中南嚮設香案於亭南將軍總督巡撫提督學政率所屬官弁文東武西於階下列班行禮分駐之提鎮道府州縣率僚屬行禮與省會同

凡常朝之禮先期由鴻臚寺奏請

御殿得

旨戒百執事至日各入陳設如儀鴻臚官引王公由

午門左右門入

太和門左右門引百官由

午門左右掖門入

昭德門

貞度門各就立位鴻臚卿二人鳴贊官二人詣

乾清門請

駕前導

皇帝御太和殿受朝謝

思官暨見朝辭朝各官以次出班就拜位行禮外國使臣之以時至者行禮亦如之禮畢

皇帝還宮餘儀與大朝同若常朝日

皇帝不御殿王公會

太和門階上百官會

闕下左右門之南若

皇帝行幸駐蹕王公百官均會

午門前王公於

闕下百官於

闕門之南咸朝服按朝班東西列坐如儀糾儀用
御史二人吏部禮部司官各二人坐班首御史
二人吏部禮部司官各二人坐班末東班西面
西班東面皆北上每月左右翼王公分單日雙
日常服列坐月朔及月之十日二十日王公分
翼暨八旗武官咸補服列坐班位均如常朝元

日

萬壽聖節均七日上元節三日上三旗四品以上官
於

太和門外五品以下暨下五旗官於

午門外咸朝服列坐亦如之

盛京文武官遇月朔及每旬五日咸朝服會

崇政殿八旗朝堂前按班列坐班視三大節皆東
西面北上與

京師同

凡

御門聽政之禮先期內閣得

旨傳知各部院官至日黎明咸集俟侍衛傳

旨宣入迺魚貫以進

皇帝陞座記注官由西階升翰林科道至西階下咸
就位立部院奏事官由東階升尚書一人奉疏
折旋而西餘入就位西面跪奉疏者至正中北
面進詣黃案前跪恭設於案興少退趨至左楹

轉入班跪奏某事畢興少退循東階左降其次
各班依序進奏如前儀吏部引

見各部院屬官畢退內閣侍讀學士二人升東階詣
案前跪奉奏疏退降階翰林科道暨侍衛皆退
大學士學士升自東階以次跪

御榻之左西面北上記注官進立

御榻之右滿內閣學士一人奉折本至黃案前北面
跪奏每奏一事

皇帝降旨大學士學士承

旨訖興由東階降記注官由西階降

皇帝還宮皆退

欽定大清會典卷二十一

欽定四庫全書薈要卷八千二百五十一 吏部

欽定大清會典卷二十二

禮部

儀制清吏司

朝會三

凡元日長至次日

皇太后聖壽節直省文武官豫期進表稱賀至日五鼓
內鑾儀衛陳儀駕於

慈寧門階下至

長信門外

詳見鑾儀衛

東西嚮內監陳中和韶樂於

慈寧宮檐下陳丹陛大樂於

長慶門內左右均北嚮鴻臚官設表案於

慈寧門東鴻臚官引王公以下入八分公以上詣

隆宗門外祇筵引不入八分公以下暨二品以上

官於

長信門外引三品以下文武各官於

午門外各序立內閣學士自內閣奉表大學士隨行內閣官二人前導至

永康左門外學士奉表授大學士禮部堂官前引升

慈寧門東階陳表於案內監四人舁案二人前導由左門入陳於

慈寧宮

寶座之東武備院卿設

皇帝拜位於

慈寧門正中質明禮部堂官詣

乾清門奏時

皇帝禮服乘輿出宮扈衛如常儀禮部堂官恭導出

隆宗門至

永康左門外降輿入王公隨入

皇帝升東階至

慈寧門左西嚮立王公等階下左右立前引十大臣

及侍衛立儀駕外御史二人鳴贊官四人卻立
慈寧門東西檐下御史禮部鴻臚官各二人立

長信門外又二人立

午門外均東西面北上鴻臚官八人分立於

永康左門

右翼門

熙和門

午門內外傳示禮部尚書奏請

皇太后御慈寧宮內監接奏

皇太后禮服出宮中和韶樂作奏豫平之章

皇太后陞座樂止禮部尚書奏行禮恭導

皇帝就拜位北嚮立丹陛樂作奏益平之章鴻臚官

引羣臣各就拜位立鴻臚官由內接傳達

午門外

凡傳如之

羣臣各就拜位立左翼西上右翼東

上均北面鳴贊官奏跪拜興

皇帝率羣臣行三跪九拜禮畢樂止恭導

皇帝復位立羣臣各復位立禮部尚書奏請

皇太后還宮內監接奏中和韶樂作奏履平之章

皇太后還宮樂止禮部尚書奏禮成恭導

皇帝降階出

永康左門外陞輿還宮王公百官各退內監移設
丹陛樂於

慈寧門內檐下左右北嚮女官設

皇后拜位於

慈寧宮檐前正中設

貴妃

妃

嬪拜位於左右稍後公主福晉以下二品命婦以

上自

永康右門入進

慈寧門序立東西丹墀禮部堂官奏請

皇后行禮內監接奏

皇后率

貴妃

妃

嬪禮服乘輿出

啓祥門前引女官八人恭導至

徽音左門外降輿入

皇后陞丹陛至檐前西嚮立

貴妃

妃

嬪東西序立公主福晉命婦按翼於丹陛上立均
東西面北上引禮女官四人立丹陛上左右東
西面引禮女官奏請

皇太后御慈寧宮內監接奏

皇太后禮服出宮中和韶樂作

樂章同前
後彷彿此

皇太后陞座樂止引禮女官恭導

皇后

貴妃

妃

嬪就拜位北嚮立公主福晉命婦各就拜位立左
班西上右班東上均北面丹陛樂作奏雖平之
章引禮女官奏行禮

皇后率

貴妃

妃

嬪行六肅三跪三拜禮公主福晉命婦隨行禮畢
樂止引禮女官恭導

皇后

貴妃

妃

嬪復位立公主福晉命婦各復位立引禮女官奏
請

皇太后還宮內監接奏中和韶樂作

皇太后還宮樂止奏禮成恭導

皇后

貴妃

妃

嬪降階出

徽音左門外陞輿還宮公主福晉命婦皆退內監
引

皇子詣

皇太后宮行禮如儀○

萬壽聖節

皇帝率王公百官於

皇太后宮行禮

皇后千秋節

皇后率

貴妃

妃

嬪公主福晉以下二品命婦以上於

皇太后宮行禮均與前儀同○恭遇

皇太后聖壽大慶

皇帝行慶賀禮大學士恭奉

御制表文詣

慈寧門東陳於案退俟於東檐宣表官稍後立大學士一人俟於西檐丹陛大樂作

皇帝就拜位北嚮跪宣表官奉表至正中北面跪大

學士二人同進左右跪展表樂暫止宣表官宣
訖興奉表還於案樂作

皇帝率羣臣行三跪九拜禮禮成

皇帝還宮禮部堂官奉表授內監恭奉入

宮餘同前儀

凡元日長至次日

皇后千秋節内外文武官皆豫期進箋稱賀是日

皇后朝於

皇太后

皇帝禮畢

御交泰殿行慶賀禮內鑾儀衛豫陳儀駕於

殿前陳車輿於

乾清門外均東西相嚮內監陳中和韶樂於

交泰殿檐下陳丹陛大樂於儀駕之南均左右北

嚮設

貴妃

妃

嬪拜位於

殿門內公主福晉以下二品命婦以上咸朝服集
隆宗門外至時

貴妃率

妃

嬪具禮服詣

交泰殿陞丹陛序立於

殿前東西嚮內監引公主福晉命婦由

隆宗門

內右門入序立於丹陛左班西面右班東面均北

上引禮女官奏請

皇后御殿內監接奏中和韶樂作奏淑平之章

皇后禮服陞座樂止引禮女官引

貴妃

妃

嬪就拜位立公主福晉命婦各就拜位立左班西
上右班東上均北面丹陛樂作奏正平之章行
六肅三跪三叩禮畢樂止引禮女官引

貴妃

妃

嬪復位立公主福晉命婦各復位立引禮女官奏
禮成中和韶樂作奏順平之章

皇后還宮樂止

貴妃

妃

嬪各還宮公主福晉命婦咸出內監引

皇子詣

皇后宮行禮如儀

欽定大清會典卷二十二

欽定四庫全書薈要卷八千二百五十二 吏部

欽定大清會典卷二十三

禮部

儀制清吏司

登極

凡

登極之禮先期分遣官祇告

天

地

太廟

社稷至日五鼓各執事官入

太和殿設

寶案於

御座前正中設

詔案筆硯案表案陳法駕鹵簿樂懸均如儀內閣學

士一人奉

詔書禮部儀制司官奉表內閣中書奉筆硯均陳於

案大學士一人率學士詣

乾清門恭奉

皇帝之寶至

太和殿奉安

寶案正中質明

皇帝詣

几筵前行祇告受

命禮畢至側殿更禮服詣

皇太后宮

皇太后更吉服陞座

皇帝行三跪九拜禮至時禮部堂官二人詣

乾清門告時

皇帝由

乾清門左旁門出乘輿導引扈衛如儀

午門鳴鐘鼓

皇帝御殿內大臣侍衛內閣禮部都察院執事
各官於

殿前行禮畢各共職事禮部尚書一人進至檐下
跪奏請即

皇帝位

皇帝御太和殿陞座鳴鞭王公百官行三跪九叩禮
畢大學士奉詔詣

寶案恭視學士用寶訖迺

頒詔布告天下

頒詔儀詳見

禮成鳴鞭

皇帝退朝至

乾清門外降輿仍由左旁門入更衣還宮次大學

士率學士奉

寶至

乾清門交貯

大內是日宮懸大樂皆設而不作表陳而不宣餘

儀均與大朝同

尊宗

凡恭上

皇太后

尊號

徽號之禮遇

國有大慶加晉

鴻稱則有

尊宗之儀均先期

勅所司備儀物製

冊

寶既諷吉分遣官祇告

天

地

太廟後殿

奉先殿

社稷前期一日恭上

皇太后奏書所司陳

皇太后儀駕樂懸如常儀設案於

中和殿及

慈寧門均正中南嚮大學士朝服奉奏書至

中和殿陳於案禮部堂官二人奏請

閱奏書

皇帝禮服乘輿出宮導引扈衛如常儀禮部堂官恭

導至

保和殿北階降輿詣

中和殿奏書案前北嚮立祇閱訖大學士一人恭
奉奏書禮部堂官二人前導詣

慈寧宮

皇帝乘輿從至

永康左門外降輿入奉奏書大學士由

慈寧門中階升卻立左門之東西面

皇帝陞自東階西嚮立大學士一人由西階升立於

西檐下宣讀官一人從升稍後立鴻臚寺鳴贊
二人分立於東西檐下禮部尚書奏請

皇太后御慈寧宮內監接奏

皇太后禮服出宮中和韶樂作

樂章與三大節同

皇太后陞座樂止禮部尚書奏行禮恭導

皇帝詣案南北嚮立大學士進至案前左右立鳴贊

官奏跪

皇帝跪大學士跪進奏書於右

皇帝受奏書恭獻授於左大學士跪接奉奏書詣案
跪陳興皆退自東西階降贊宣奏書宣讀官進
至案前北面奉奏書跪宣訖陳於案興退自西

階降奏拜興丹陛大樂作

樂章與三
大節同

皇帝行三跪九拜禮樂止復位立中和韶樂作

樂章與三

大節

同

皇太后還宮樂止禮部尚書奏禮成恭導

皇帝降階出

永康左門乘輿還宮大學士以下皆退○至日五鼓所司陳法駕鹵簿樂懸陳

皇太后儀駕樂懸皆如儀設案於

太和殿內又設案於

慈寧門外暨階下均正中南嚮又設案於左門之東西嚮質明禮部堂官詣內閣奉

金冊

金寶並

冊寶文於龍亭鑾儀校舁行禮部官前導至

太和殿設

冊亭於案東

寶亭於案西奉

冊寶陳於案皆退鴻臚官引王公由

太和門左右門入序立丹陛上引公侯伯子男文

武一二品官序立

右翼門外三品以下各官序立

午門外咸朝服屆時禮部堂官奏請

冊

寶

皇帝禮服乘輿出宮導引扈衛如常儀禮部堂官二人恭導至

太和殿北階降輿詣

冊寶案前北嚮立祇閱訖奉

冊寶官奉安於龍亭鑾儀校舁行詣

慈寧宮

皇帝乘輿從禮部堂官前導王公暨文武二品以上
官各於所立位跪候

冊寶龍亭

御駕過輿以次從至

永康左門外

皇帝降輿入龍亭至

慈寧門東階下止奉

冊寶官恭奉

金冊寶陳於階下案大學士二人奉

冊文

寶文由中階升陳於門左案退立於案東西面

皇帝陞自東階西嚮立大學士二人由西階升立於

西檐下宣讀官二人從升稍後立均東面鴻臚

寺鳴贊二人立東西檐下王公文武二品以上

官記注糾儀傳贊各官序立均與三大節同禮

部尚書奏請

皇太后御慈寧宮內監接奏

皇太后禮服出宮樂作

樂章與三大節同

皇太后陞座樂止奉

冊寶官就案奉

金冊寶升中階陳於中案退自西階降禮部堂官恭導

皇帝詣拜位北嚮立羣臣各就拜位大學士進至中

案前左右立鳴贊官奏跪

皇帝跪羣臣皆跪奏進

冊大學士跪進

冊文於右

皇帝受

冊恭獻授於左大學士跪接詣中案跪陳興皆退奏進
寶

皇帝恭獻大學士跪進跪接如之皆退自東西階降

執宣

冊宣讀官進至案前北面奉

冊跪宣訖陳於案興退贊宣

寶亦如之皆退自東西階降內監四人昇

冊寶案二人前引由中門入陳於

慈寧宮門外正中奏拜興丹陛大樂作

樂章與三大節同

皇帝率羣臣行三跪九拜畢樂止恭導

皇帝復位羣臣復位立中和韶樂作

樂章與三大節同

皇太后還宮樂止禮部尚書奏禮成恭導

皇帝降階出

永康左門乘輿還宮羣臣各退是日

皇后禮服率

妃

嬪公主福晉命婦詣

皇太后宮行慶賀禮次日


皇帝御太和殿羣臣上表行禮

頒詔布告天下直省文武官及四夷屬國進表稱賀

均與三大節同

卷二十三

欽定大清會典卷二十三



總校官候補中書臣吳紹潔
校對官檢討臣王鍾健
謄錄監生臣葉椿

欽定四庫全書薈要

史部

欽定大清會典卷二十四至
六

詳校官編修臣繆晉



欽定四庫全書薈要卷八千二百五十三

吏部

欽定大清會典卷二十四

禮部

儀制清吏司

冊立

凡

冊立

皇后之禮先期

勅所司備儀物製

冊

寶既諏吉分遣官祇告

天

地

太廟後殿

命大學士尚書充正副使前期一日

皇帝親詣

奉先殿以

冊立告至日五鼓所司陳法駕鹵簿樂懸陳
皇后儀駕樂懸皆如儀設

節案於

太和殿正中南嚮設

冊案於左西嚮

寶案於右東嚮內監設

節案於

皇后宮正中前設香案均南嚮設

冊寶案於兩旁東西嚮設

皇后拜位於香案之南禮部堂官詣內閣偕內閣學

士奉

節及

金冊

金寶

冊寶文於龍亭鑾儀校舁行禮部官前導至

太和殿階下亭止執事官奉

節

冊

寶以次升中階入

殿內陳於案退質明授

節大學士一人立

殿左門外宣

制官一人立大學士後均西面正副使立丹墀之東

西面北上屆時禮部堂官奏請

御殿

皇帝禮服乘輿出宮導引扈衛如常儀

御太和殿中和韶樂作

陞座樂止階下鳴鞭鴻臚官引正副使就拜位丹陛
樂作贊如儀行三跪九叩禮樂止引正副使由
左階升立丹陛左北面西上宣

制官進至

殿中門外東立西面贊有

制正副使跪宣

制官宣

制訖大學士由

殿左門入奉

節出

殿中門授正使正使受興副使隨興西面立執事

官由

殿左右門入舉

冊寶案出

殿中門正使持

節前行副使隨案後均降自中階陳

冊

寶於龍亭鑾儀校舁行由

太和門中門出

賜王公百官坐

賜茶畢鳴鞭中和韶樂作

皇帝還宮樂止羣臣各退正副使至

景運門外以

節授內監內監持

節昇

冊寶亭至

皇后宮門外亭止以次奉

節

冊

寶由中門入丹陛樂作

皇后御禮服引禮女官二人恭導出迎於

宮門內道右候過隨入

殿東面立內監奉

節陳於中案

冊

寶

冊寶文陳於東案樂止女官二人恭導

皇后就拜位北面立又女官四人立拜位左右均東
西面宣讀女官二人立東案之南西面引禮女
官奏跪

皇后跪贊宣

冊宣讀女官奉

冊文宣訖贊受

冊女官一人奉

冊自右跪進

皇后祇受授於左女官一人跪接興陳於西案次宣

寶受

寶儀如之奏興

皇后興奏行禮丹陛樂作

皇后行六肅三跪三拜禮畢樂止恭導

皇后至

宮門內道右立內監奉

節出丹陛樂作

皇后恭送如初迎儀候過樂止

皇后還宮內監至

景運門外以

節授正使正使持

節同副使詣後左門復

命翼日

皇帝禮服率羣臣詣

皇太后宮行慶賀禮

皇后禮服率

妃

嬪公主福晉命婦行禮如儀

皇帝御太和殿王公百官上表行慶賀禮

頒詔布告天下

皇后禮服朝於

皇帝如儀

皇后還宮

貴妃

妃

嬪禮服公主福晉命婦朝服詣

皇后宮行慶賀禮王公百官直省文武官及四夷屬

國進

表進

箋稱賀均與三大節同

尊封

凡

尊封

皇祖妃嬪

皇考妃嬪之禮

勅所司備儀物製

冊寶印

皇貴太妃

冊印

貴太妃

太妃

冊

寶

既諏吉前期一

日遣官祇告

太廟後殿

奉先殿至日鑾儀衛設仗

皇貴太妃 貴太妃 儀仗 太妃以下采仗

於本

宮門外內監設

冊寶印案於宮內正中南嚮禮部尚書朝服詣內閣

內閣官奉

冊寶印於采亭鑾儀校舁行列繖仗禮部官前導大學士禮部尚書各一人恭送至

太妃

太嬪宮門授內監內監舁亭入至階下亭止奉

冊寶印陳於案恭上

太妃

太嬪出告禮成大學士尚書各退如尊加

太妃封號

皇帝親詣行禮鑾儀衛設仗如前儀內監設

太妃座於宮內

皇貴太妃 貴太妃 座西南嚮 僉設 太妃 西嚮旁設 如同日並封

皇貴太妃 南嚮僉設

太妃 貴太妃 西嚮 東所司設案於宮

門外正中南嚮又設案於門左西嚮禮部侍郎
詣內閣暨內閣學士朝服奉

金冊金寶金印並

冊寶印文於采亭內鑾儀校舁行列御仗前導如儀

至太和殿

御座前左右陳設

冊亭左寶亭右如同日並封
僉設旁設各從其宜皆冊亭

在上寶印
亭在下

皇帝禮服乘輿出宮導引扈衛如常儀

御太和殿南嚮立閱冊寶印訖鑾儀校舁亭詣

太妃宮至宮門階下亭止大學士二人

如同日並封兼用侍

郎學士奉接皆同

冊寶印文由中階升陳於門左案卻立案後西面禮

部侍郎內閣學士奉

冊寶印從升陳於中案退宣讀官二人

如同日並封各用一人

立西檐下糾儀御史禮部官各二人立西階下

均東面鴻臚寺鳴贊二人立左右檐下東西面

皇帝乘輿至

太妃宮門階前降輿禮部堂官二人恭導陞自中
階門左西嚮立內監啟

太妃禮服升座

皇帝詣正中案前北嚮立大學士進至中案左鳴贊
奏進

冊大學士跪進

冊文

皇帝立受拱舉仍授大學士大學士與陳於中案退
奏進寶印儀與進

冊同大學士皆退自東階降贊宣

冊宣讀官進至中案前北面奉

冊跪宣訖陳於案興退贊宣寶印亦如之皆退自西
階降內監舁

冊寶印案進設

太妃座前奏跪拜興

皇帝行二跪六拜禮

太妃起避立座旁禮畢

太妃降座還宮禮部尚書奏禮成

皇帝由中階降乘輿還宮各退

冊封一

凡

冊封之禮

皇貴妃

貴妃

冊寶

妃

冊印

嬪

冊皆製以金先期

勅所司備物具禮既諏日遣官祇告

太廟後殿

奉先殿

若專封嬪不告

由部奏請

命大學士尚書侍郎學士充正副使至日鴻臚寺設

節案於

太和殿正中設

冊案於左寶印案於右內監設

節案於受封

皇貴妃

貴妃

妃

嬪宮內正中前列香案均南嚮設

冊寶印案於左右東西嚮設仗於本宮門前

皇貴妃

儀仗 妃

嬪采仗 嬪儀衛設采亭於內閣門外內閣禮

部官奉

節

冊寶印及宣讀

冊寶印文陳於亭鑾儀校舁行前列繖仗禮部官前

導至

太和殿階下亭止奉

節

冊寶印升入

殿陳於案大學士一人立於

殿外正副使立於丹墀東咸朝服西面屆時鴻臚
官引正副使升自東階至丹陛左北面立大學
士入

殿左門奉

節由中門出正副使跪大學士奉

節授正使正使受

節興副使隨興西面立禮部官入

殿舉

冊寶印各案出正使持

節前行副使隨案後由中階降仍陳采亭內出

太和門中門至

景運門外以

節授內監內監持

節昇采亭入陳

節於中案陳

冊寶印及文於東案受封

皇貴妃

貴妃

妃

嬪禮服出迎於宮門內道右候過隨入引禮女官
引就拜位北面跪贊宣

冊宣讀女官奉

冊文宣訖贊受

冊宣讀女官奉

冊文授侍右女官跪授

皇貴妃

貴妃

妃

嬪祇受訖授侍左女官女官跪接興陳於案次宣
寶印受寶印亦如之迺行六肅三跪三叩禮畢
引禮女官引復原位立內監持

節出

皇貴妃

貴妃

妃

嬪送如初迎儀內監出

景運門以

節授正使正副使詣後左門復

命

冊封二

凡

冊封親王暨王世子

冊寶皆金製郡王

冊印銀製飾以金以領侍衛內大臣內大臣散秩大
臣禮部侍郎內閣學士翰林院讀講學士充正
副使長子貝勒貝子

冊紙製以內閣侍讀學士翰林院讀講學士侍讀侍
講禮部郎中員外郎主事充正副使先期備物
具禮至日執事官設案於

太和殿丹陛上正中南嚮又設

節案於受封王等殿堂正中前設香案均南嚮左設

冊寶印案西嚮設王等儀衛於庭鑾儀衛設采亭於
禮部儀制司官奉

節舉

冊寶印陳於亭內鑾儀校舁行前列御仗禮部官前
導禮部侍郎隨行至

太和殿階下亭止儀制司官奉

節至

太和殿階上陳

節於案正副使朝服詣案左跪北面西上禮部侍郎
奉

節授正使正使受

節偕副使興鑾儀校舁亭出

太和門中門至

午門外正使以

節授禮部官出

長安門咸乘馬將及府第下馬正使持

節前行副使奉

冊禮部官奉寶印隨行樂作受封王等率所屬官跪
迎於府門外道右候過興隨入樂止正副使奉
節

冊入殿堂禮部官奉寶印隨入各陳於案正副使就
案東立西面王等就拜位北面立樂作行三跪
九叩禮樂止興進至香案前跪宣讀官宣

冊訖正使奉

冊授王等王等祇受轉授從官從官跪受興陳於案
次宣寶印訖副使奉寶印授王等王等祇受如
前儀興復位樂作行三跪九叩禮畢樂止正使
持

節出副使從王等跪送如初迎儀

凡

冊封公主

冊用金製以內閣侍讀學士翰林院讀講學士侍讀

侍講禮部郎中員外郎主事充正副使至日設
節案於公主府聽事正中前設香案左設

冊案設公主儀衛於庭正副使自

太和殿持

節往封均如王等受封之儀及府第公主率所屬官
命婦朝服跪迎於大門內道右候過隨入及聽
事正副使陳

節

冊於案退就案東立西面公主就拜位北面立樂作
行六肅三跪三叩禮興進至香案前跪宣讀官
宣

冊訖正使奉

冊授女官女官跪接以授公主祇受仍授女官公主
興復位行六肅三跪三叩禮樂止正副使出公
主跪送

節如初迎儀

凡親王世子郡王福晉長子貝勒貝子夫人每
五年由部彙疏請行

冊封禮

制冊節使各視夫爵均先期備物具禮至日設

節

冊案於王等殿堂設儀衛於庭正副使持

節往封福晉等朝服跪迎正副使設

節

冊於案廼就拜位宣

冊受冊行禮畢正副使出福晉等跪送

節儀並與公主受封同

凡郡主縣主郡君每五年由部彙請

冊封

冊以紙製餘儀與福晉夫人受封同

欽定大清會典卷二十四

欽定四庫全書薈要卷八千二百五十四

史部

欽定大清會典卷二十五

禮部

儀制清吏司

經筵

凡

經筵之禮以大學士尚書左都御史侍郎學士詹事

充

經筵講官滿漢各八人歲春秋仲月由部疏請得

旨翰林院列講官名具奏以滿漢各二人分講經書

掌院學士暨直講官擬篇目撰講章奏請

欽定至日黎明遣大學士一人祇告

皇師

帝師

王師

先聖

先師於

傳心殿

親詣行禮則於前一鴻臚官設
日均詳見吉禮

御案於

文華殿

御座前南嚮設講案於

御案之南北嚮翰林院官奉講章及進講副本左書

右經各陳於案退記注官四人立西階下東面

滿講官暨侍班之大學士吏部戶部禮部尚書

侍郎通政使副使詹事少詹事立丹墀左西面
漢講官暨侍班之兵部刑部工部尚書侍郎左
都御史左副都御史大理卿少卿立丹墀右東
面糾儀給事中御史各二人鴻臚寺鳴贊二人
立侍班官稍後東西面均南上如衍聖公入

覲恭遇

經筵立於東班之首至時禮部堂官詣

乾清門奏請

御經筵

皇帝御常服乘輿出宮導引扈衛如常儀由後左門
出左翼門至

文華殿丹陛上降輿入

陞座記注官升西階入立

殿內右楹之西鳴贊升立東西檐下贊排班講官
暨侍班官咸就拜位北面立贊跪叩興行二跪
六叩禮畢鴻臚卿東西各一人引講官暨侍班

官分行升自東西階滿講官由

殿左門之右漢講官由右門之左入立於東西楹之南東侍班官由左門之左西侍班官由右門之右入立於講官後糾儀官隨入立東西隅均東西面北上鴻臚卿退立於

殿檐下鳴贊贊進講滿漢直講官四人出至講案前東班西上西班東上行一跪三叩禮復位立滿講官一人出就案左北面展講章進講四子

書畢復位漢講官一人趨過案左進講如之
皇帝闡發書義宣示臣工講官暨侍班官跪聆畢興
又滿講官一人趨過案右漢講官一人出就案
右先後進講經義畢

皇帝闡發經義各官跪聆亦如之鴻臚卿引出

殿至丹墀各就拜位立鳴贊贊如初行二跪六叩
禮畢內監設坐氈於

殿內東西各二行鴻臚卿引講官侍班官按品臚

序仍升東西階入

殿內

賜坐

賜茶儀與常朝同禮部尚書奏禮成

駕興至丹陛陞輿還宮是日

賜燕於

太和門東廊講官暨侍班記注糾儀各官咸與燕
畢詣內金水橋南丹墀東行一跪三叩禮各退

視學

凡

視學之禮豫期由部疏請行取行聖公五經博士至
聖裔五人元聖周公裔四配十二哲裔各二人
乘傳赴京暨各氏子孫列官於朝者各官學師
生直省在京需次之進士舉人貢監生成與觀
禮內閣擬經書國子監祭酒司業撰講章均進

呈

欽定至日工部官張大次於大成門東設

黃幄

御座於彝倫堂內鴻臚寺設

御案於幄前少東均南嚮設講案二於左右東西嚮
祭酒司業奉講章及進講副本左書右經各陳
於案

皇帝禮服乘輿詣學

儀與丁祭
親詣同

法駕鹵簿前導

前引後扈如常儀祭酒司業率所屬官暨進士

舉人朝服諸生公服跪迎於成賢街道右

皇帝至

廟門外降輿入太常卿二人恭導詣

大成殿釋奠於

先師孔子

儀詳吉禮

禮畢出大成門入大次更衣服王公

以下咸更衣服王公序立於大次之南各官均

先詣彝倫堂庭中按朝班東西序立衍聖公在

東班之首五經博士各氏後裔在班末均東西

面北上記注官四人立西階下東面糾儀給事
中御史各二人鴻臚寺鳴贊二人立東西階下
均東西面北上宣制官一人立東檐下西面祭
酒司業率所屬官及進士舉人肄業諸生序立
太學門內東西面南上禮部尚書奏請
行講學禮太學鳴鐘鼓

皇帝出大次至門外乘輿導迎樂作由太學中門入
王公等隨入祭酒以下跪候

駕過興成隨入

皇帝至彛倫堂降輿

御講幄

陞座記注官升西階入立堂內右楹之西糾儀官升
東西階立東西檐下第三柱鳴贊升立第二柱
王公立階上各官立階下均東西面鳴贊贊排
班衍聖公率五經博士各氏後裔祭酒司業率
所屬官及進士舉人諸生咸就拜位北面立班

齊贊進衆進贊跪叩興衆行三跪九叩禮畢

賜王公暨行聖公大學士九卿坐鴻臚官引由左右
門入堂內咸跪行一叩禮坐翰詹四品以下官
國子監官六堂諸學師儒五經博士各氏後裔
進士舉人肄業諸生皆列東西階下圜堂下聽
講鳴贊贊進講滿漢祭酒二人由左門入司業
二人由右門入均北面立贊舉案執事官舉

御案至

御座前

賜直講官坐祭酒就東案西面司業就西案東面各行一叩禮坐滿漢祭酒以次講四子書司業講經亦如之講畢贊舉案執事官舉

御案置原位王公以下起立祭酒司業出率所屬官暨進士舉人諸生就拜位北面立禮部尚書奏傳

制鳴贊贊有

制祭酒以下皆跪宣制官進至中門左宣

制曰聖人之道如日中天講究服膺用資治理爾諸生其勉之宣訖贊叩興祭酒率衆行三跪九叩禮先退至成賢街恭俟

賜王公大臣恭跪受坐飲各行一叩禮畢由左右門出就階下序立禮部尚書奏禮成

駕興陞輿出太學門導迎樂作祭酒以下跪送如初
迎儀

皇帝還宮次日衍聖公率五經博士各氏後裔祭酒
司業率所屬官暨進士舉人諸生具表謝

恩所司陳法駕鹵簿樂懸如常儀王公百官咸朝服
會

闕下

皇帝禮服

御中和殿執事各官行禮畢

御太和殿鴻臚官引王公百官各就位贊行三跪九

叩禮次引衍聖公暨祭酒以下東西分班各就
拜位跪宣表官奉表跪宣訖贊行三跪九叩禮
賜坐

賜茶均如大朝之儀是日

賜衍聖公內閣翰林院詹事府國子監各官燕於禮
部五經博士各氏後裔暨執事官咸與越三日
頒

勅於太學

詔諸生而策勵之

賜衍聖公貂冠朝服祭酒司業監丞五經博士各氏
在京官衣皆一襲各氏後裔太學六堂師生宗
學覺羅學咸安宮學景山學八旗學義學副管
教長助教教習學生暨進士舉人白金有差增
廣是科太學鄉試中額送各氏後裔觀禮者入
監讀書○

皇帝特舉

幸魯盛典展禮

先師迺講學於

闕里豫期

命大臣偕衍聖公遴選聖裔賢裔二人充直講官翰
林院撰擬講章均奏請

欽定前期一日有司張大次於奎文閣前設

御座於詩禮堂內設

御案於座前設

勅案於左楹之東均南嚮設講案於堂西檐下東嚮
至日翰林院官陳講章於

御案進講副本於講案內閣官陳

勅於

勅案

皇帝龍袍袞服乘輿出

行宮詣

闕里騎駕鹵簿前導前引後扈如常儀衍聖公衆

服率五經博士暨各氏後裔跪迎於廟門外道

右

皇帝至奎文閣前降輿太常卿二人恭導詣

大成殿致祭於

先師孔子

儀與丁祭親詣同

禮畢出同文門至奎文閣

入大次少憩隨

駕官暨地方守土官序立於承聖門左衍聖公以下

序立於承聖門右禮部尚書奏請

行講學禮

皇帝出大次乘輿禮部堂官二人恭導入承聖門衆
皆跪候

駕過輿地方官司道以下竢立於門外各官隨入
皇帝至詩禮堂降輿

陞座各官至庭中仍按左右序立大學士一人立東
檐下西面宣

勅官一人立大學士後鴻臚卿二人鳴贊二人立兩

階上東西面鳴贊贊排班衍聖公五經博士各
氏後裔就西階拜位立北面東上贊跪叩興行
三跪九叩禮畢復位贊進講直講一人升自西
階詣講案前一跪三叩興東面立講四子書訖
次直講一人詣案講經亦如之皆退復位立鴻
臚卿奏宣

勅衍聖公以下詣拜位立鳴贊贊跪衆皆跪大學士
由堂左門入奉

勅由堂中門循闌左出授宣

勅官奉至階前西面立宣訖降自中階授行聖公行
聖公祇受授執事官鳴贊贊叩興行聖公率五
經博士各氏後裔行三跪九叩禮畢鴻臚官引
各官出毓粹門序立祇竢禮部尚書奏禮成
駕興乘輿禮部堂官二人恭導出毓粹門詣

孔林行禮畢

儀見
吉禮

還行宮衆皆退翼日

賜行聖公蟒衣狐裘貂裘表裏書籍五經博士書籍
衣幣各氏後裔衣幣白金各有差學政簡各氏
弟子員有文行者貢入太學其在仕籍者均進
一階增廣是年山東各府州縣入學名額

巡幸

凡

巡幸之禮

皇帝省方觀民

特舉時巡盛典既諏吉王公暨內閣部院府寺監各
官均列名具奏請

旨扈蹕先期一日遣官以

巡狩祇告

奉先殿至日鑾儀衛陳騎駕鹵簿於

鑾輿所出禁門外

皇帝御征衣乘輿出宮領侍衛內大臣前鋒護軍統領率禁旅翊衛扈蹕諸臣皆征衣乘騎以次隨發王公百官咸采服跪送內閣學士率中書恭奉

御寶以從部院有執事者攜

行在印備用

鑾輅所經禁隨

駕官弁軍士擾吏民踐禾稼內務府供

御營器用守土官動公帑備糗糧芻茭有借端科斂者論如法○直省將軍督撫提鎮及所屬文武官弁咸朝服各於所治境外恭迎道右紳士耆老隨遠近跪迎既

駐驛督撫提鎮率屬朝於

行營正門之外至

巡省之方翼日望秩於

方嶽及祭古昔

帝王功德隆重者

先聖

先師皆

親詣行禮境內山川先賢名臣忠烈祠墓並遣官致

祭

詳見祠祭司

○

駐蹕行營日覲封疆大吏監司郡縣

諮詢風土人情

臨視河防

指授方畧

召試陳詩獻賦之士拔其尤者量授以官

親閱方鎮重兵以辨將備軍士材武經過州縣

賜復蠲租存問高年賞賚各有差○

皇帝回鑾守土官於所治境外跪送在

京王公文武京堂武官副都統以上暨

內廷供奉記注翰林科道等官咸采服出郊外跪迎

駕還宮次日遣官以

回鑾祇告

奉先殿如初禮

御新宮

凡

皇帝御新宮前期一日遣官各一人祇告

天

地

太廟

社

稷屆期內大臣侍衛齊集候隨

皇帝臨新宮鑾儀衛設法駕鹵簿樂部設樂懸於

太和殿前禮部官設王等所進慶賀表文於

太和殿內左楹黃案上王以下文武各官咸朝服
齊集於

太和殿前禮部堂官奏請

陞殿

皇帝御中和殿陞座內大臣侍衛內閣大學士禮部
都察院堂官鴻臚寺鳴贊官行三跪九叩禮畢

皇帝御太和殿鳴鐘鼓樂作

陞座樂止鳴鞭內外王以下公以上於丹陛上兩旁
立鳴贊官贊進贊跪衆皆跪贊進表宣表官奉
表文至檐下正中跪宣畢鳴贊官贊行三跪九
叩禮畢各就原位立乃

賜燕王公等入

殿內內大臣侍衛在丹陛上各官在丹墀青幕內
各就坐行一叩禮禮畢鳴鞭作樂

皇帝還宮衆皆退

凡

皇太后御新宮前期一日遣官祇告

太廟後殿

奉先殿屆期豫設

皇太后儀駕樂懸於宮門內外

皇太后禮服乘輿出宮樂作儀駕前導引禮大臣命婦

前引至

慈寧宮候

皇太后陞後宮暫憇執事官豫設

皇帝拜位於

慈寧門正中禮部堂官奏請

皇帝禮服乘輿出宮禮部堂官恭導出

隆宗門至

永康左門降輿至

慈寧門下東旁立禮部堂官轉傳內監奏請

皇太后陞座樂作

皇太后御慈寧宮

陞座樂止禮部堂官恭導

皇帝詣正中拜位上立鴻臚寺官引內大臣侍衛於

儀駕末排立鳴贊官奏跪拜興丹陛樂作

皇帝行三跪九拜禮內大臣等皆隨行禮畢禮部堂

官恭導

皇帝復原位立轉傳內監奏請

皇太后還宮樂作

還宮樂止禮部堂官導

皇帝出乘輿還宮執事女官豫設

皇后拜位於

慈寧宮檐前正中設

貴妃

妃

嬪拜位於左右稍後禮部堂官轉傳內監奏請

皇后禮服率

貴妃

妃

嬪詣

皇太后宮行禮依次乘輿自

啟祥門出前引命婦八人恭導至

徽音左門外降輿至

慈寧門下東旁立

貴妃

妃

嬪等序立引禮女官轉傳內監奏請

皇太后陞座

皇太后御慈寧宮樂作

陞座樂止引禮女官恭導

皇后詣正中拜位立

貴妃

妃

嬪於左右稍後均止嚮立丹陛樂作二大臣命婦

奏請

皇后率

貴妃

妃

嬪行六肅三跪三拜禮禮成咸入

慈寧宮內

賜燕燕畢謝

恩行二肅一拜禮二大臣命婦導

皇后率

貴妃

妃

嬪復原位立轉傳內監奏請

皇太后還宮樂作

皇太后還宮樂止引禮女官恭導

皇后率

貴妃

妃

嬪自

徽音左門出乘輿還宮衆皆退

欽定大清會典卷二十五